

稽

瑞

[



成集書叢

編初

著 編 主
五 雲 王

行發館書印務商



瑞

稽



3 0649 0466 1

輯 慶 劉

本館據後知不足齋
叢書本影印初編各
叢書僅有此本

083

114

2:02

稽瑞自叙

方今元日朝會上公

上壽已文部尚書奏天下瑞九四辨其名數曰大曰上曰中曰下公卿大夫畢賀而退惜其國家之大事帝王之休祥未列著述蓋闕如也遂徵諸圖史著稽瑞一篇考事以爲對切對以爲句并一

50127

對對下隨而解之往者隋顏之推賦稽
聖一章凡數句之內辨識一事蓋詞多
而事寡又非其文今之作一句一事其
解則大者十餘家小者亦三四而已不
求文理直紀休徵云

維嵩白雲子劉賡書

重刊稽瑞序

子思子曰國家將興必有禎祥禎祥之事見於上世者不一自後世狐鳴篝火之術興圖讖緯書往往偽託是以聖君賢相戒在下不許言瑞要之天地靈異之氣日流行於宇宙而與人心相感召順氣應之則兆而為祥逆氣應之則化而為妖是則符瑞之見於世者不必侈其事而何可謂無其理也唐劉賡氏著稽瑞一卷廣徵載籍博紀休祥鍊事成文儻句以配又恐後之讀其辭而昧所自也并自為之注唐時去古猶近祕閣所藏多人間未見之本迄今按註中篇目半歸放失甚矣古書之不傳者多矣按是書亦見

王厚齋玉海祥瑞類中徧徵各家書目俱不載曩時
虞山陳君子準博雅嗜古購藏宋元槧本偶獲是書
珍同寶笈即名其藏書樓曰稽瑞志喜也欲重刊行
世會病歿不果今年春顧生湘購得之偕其弟浩校
勘付梓屬余為序余作而歎曰善哉兩生之好古也
是書歷千餘載以來不大顯於世其不就湮滅者幾
希陳君欲傳之不果烏知閱數歲而有兩生之竟其
志耶甚矣古書之顯晦亦有其時也然則其不傳者
亦未過其人耳傳不傳豈盡繫乎書之故哉至是書
注中既詳言某代某朝則其瑞之為實為侈令讀者
自得之其微旨有寓於本文之外然則其足傳者又

不第補史冊之闕遺供文人之漁獵已也道光十四
年太歲甲午冬十一月太倉季錫疇誤

種
端
序

稽瑞

維嵩白雲子劉

唐

關西靈長氏許光祚

註



堯星出翼舜龍負圖

孫氏瑞應圖曰景星或如半月或如星中空或如赤氣先月出西方故曰天見景精明王出號令合人心制禮合人意則見星於晦朔助日光也堯時出翼舜時出房景德也其狀無常有道之國王者無私之應也

春秋運斗樞曰舜以太尉受禪即位五年二月東巡狩至於中舟與三公諸侯臨觀黃龍五色負圖

稽瑞

一

出置舜前以黃玉爲匣如櫝長三尺廣八寸厚一寸四合而連有戶此合樞紐之命龍匣皆黃也四合有輯道相入也有戶言開閉也白玉檢黃金繩黃金艾爲泥封之瑞章曰天章帝符璽五字廣袤各三寸深四分鳥文舜與三公大司空禹等三十人集發圖玄色而縑狀可卷舒長三十尺廣九尺中有七十二帝地形之制天文宮序位列分度若天日月五星變

齊一角獸梁三足鳥

孫氏瑞應圖曰一角瑞獸也六合同蹄則至熊氏瑞應圖曰天下太平則一角獸至 蕭子齊書

曰武帝永明十年鄱陽獲一角獸麟首鹿形龍鸞
共色

抱朴子曰三足鳥日之精也日為太陽其精為鳥
而三足 梁大同起居注曰九年豫州刺史侯荆
明表稱忽見衆鳥連群數百集於楊樹飛繞其巢
往視之獲三足鳥以獻詔付華林園養之群鴉飛
翔鳴繞三足鳥乃啣食往哺

五老河遊萬歲山呼

論語讖曰仲尼云吾聞堯舜等遊首山觀河渚有
五老遊河渚將來告帝期五老曰河圖將歸造帝
謀三老曰河圖將來造帝書四老曰河圖將來告

帝圖山川煥張聖人恩五老曰河圖將來告帝浮
龍金泥玉檢封成書五老飛為流星上入昴 宋
均曰浮龍龍浮水也

漢書曰武帝封禪山呼萬歲黃金為泥白銀為繩
告太平於天下羣臣之功也

觸邪獬豸除害駟駮

徐氏瑞應圖曰王者獄訟平獬豸至 王充論衡
曰獬豸者神奇之獸為瑞應也 許氏說文曰其
狀如牛一角四足似熊薰芭輿服志或曰如羊蓋
神羊也 神異經曰獬豸色青 田俅子曰堯時
獲之緝其皮以為帳 論衡曰臯陶治獄其罪疑

者令一角羊觸有罪則觸無罪則否故臯陶治獄
平勑羊跪坐事之

山海經曰駘駘幽隱之獸也其狀如馬出於北海
孫氏瑞應圖曰有明王則駘駘來爲時辟除災
害 熊氏瑞應圖曰王者德感則駘駘至 周書
王會曰成王時愚氏來獻駘駘也

真人何黃馬鬣何朱

孫氏瑞應圖曰黃真人守曰水國方自隆也

熊氏瑞應圖曰王者在上則白馬赤鬣至 禮斗
威儀曰周文王時白馬朱鬣 山海經曰白馬赤
鬣出大封之國乘之壽三千歲文馬縞衣身朱鬣

者也

酋耳若豹比翼如鳧

周書王會曰成王時英林獻酋耳酋耳者身若虎豹尾長其身食虎豹

山海經曰比翼一名鷦鷯一名蠻其狀如鳧一翼一目色青赤處於南山昆吾金門之山詰胷國東不比不飛 孫氏瑞應圖曰王者德及高遠則比翼鳥至 又曰王者有孝德則至

禹獲玄珪順反明珠

孫氏瑞應圖曰王者勤苦以應天下厚人而薄己水泉通四海會同則玄珪出夏禹之時卑宮室盡

力溝壑天賜以玄珪

禮斗威儀曰人君乘金而王其政象平海出明珠
孝經援神契曰王者德及淵泉則海出明珠

東觀漢記曰順帝永安四年漢陽率善都尉滿密
因桂陽太守文磐獻大明珠詔曰海內頗害異而
磐不惟竭忠而喻明珠之求也求媚煩擾令封珠
還滿密

莫莢夾階薜莆生尉

孫氏瑞應圖曰莫莢瑞草也蓋神霧之嘉瑞也

白虎通曰月朔日生一莖十五日而生十五莖十
六日日落一莖 帝王世紀曰及晦而盡若月小

則餘一莢厭而不落以是占日月之數一名麻莢
堯時夾階而生逐月而死

白虎通曰蘼莆者樹名也其狀如蓬枝多根如絲
葉如扇不搖自動轉而生風至於飲食清涼驅殺
蟲蠅以助供養也一名倚蘼一名倚扇一名實賓
櫛 春秋潛潭巴曰君臣和德道度叶中則孳於
庖厨 孝經援神契曰王者德至山陵則阜出
孫氏瑞應圖曰王者不徼味庖厨不踰梁盛則生
於厨也 田俵子曰昔帝堯之為天下平也出庖
厨為帝去惡 孫氏瑞應圖又曰冬則死夏則生
虞舜即政又生庖厨也

麟蓋玄枵鳳銜赤苻

公羊傳曰麒麟仁獸也 春秋考異圖曰麟蓋玄

枵之陰精也亦曰歲星散而為麟蓋木之精也牝

曰麒牡曰麟 孫氏瑞應圖曰麟不踐生蟲不折

生草不入坑窞不觸羅網食嘉禾之實飲珠玉之

英

鷩冠子曰鳳凰鷩火之鳥也太陽之精 春秋合

讖圖曰堯坐中舟與太尉舜臨觀鳳皇負圖以赤

玉為匣長三尺廣八寸厚一寸玉檢白繩封兩端

以紫芝為泥曰天赤帝苻璽五字深四分廣袤三

寸圖以赤色為染白為文也

鸞表帝軒龜感有虞

尚書候曰軒轅之世聖德提象配永循機鸞鳥來儀

世紀曰舜即天子位洛出龜六十五字是爲洪範所謂洛書

非煙五起榮光四鋪

史記曰若烟非烟若雲非雲郁郁紛紛蕭索輪菌是爲卿雲

尚書中候曰堯即位七十載景星出翼鳳皇止庭朱草生郊嘉禾孳連甘露潤液醴泉出山脩壇河洛榮光出河休氣四塞榮光者五色出河也美氣

四塞炫耀白雲起迴風援馬銜押赤文綠色龍形
象馬赤帝標怒之使所以藏文赤文綠地也

茲白食豹騰黃似狐

周書王會曰成王時義渠獻茲白茲白者若白馬
鑿齒食虎豹 山海經曰六駿之狀如此

又曰騰黃亦曰飛黃其狀如狐出白民之國 孫
氏瑞應圖曰王者德御四方輿服有度秣馬不過
所業則地出乘黃 世紀虞舜時出 周書王會
曰成王時白民獻乘黃也

玉馬光澤金車耀途

孫氏瑞應圖曰王者六律調五聲節制致因時治

道則玉馬來一本爲玉澤馬 熊氏瑞應圖曰王者清明脩理則見

孫氏瑞應圖曰王者至行仁德廣施則金車出又曰帝舜則德盛金車出於庭也

何背璆瑁何鈎珊瑚

孝經援神契曰神靈滋液百珍寶用有璆瑁背宋均曰璆瑁水蟲如龜而背有文

又曰神靈滋液百珍寶用有蘇胡鈎 宋均曰王者得信則出 孫氏瑞應圖曰王者恭信即見一本云王者不玩弄則見也

吉利鳥形鱉封獸軀

孫氏瑞應圖曰吉利鳥形獸頭也

周書王會曰成王時區易獻鱉封者若燕前後有首黑文又曰鹿螯山獸左右有首名并蓬 郭璞

曰即并封是也

何爲鳶白何爲鷄趨

晉中興書曰孝宗永和九年吳毘獻白鳶

孫氏瑞應圖曰雞趨王者有德則見也

獸却魍魎麟降匈奴

東方朔十洲記曰天漢三年西國王獻犬使者曰

王於先天林而請猛獸却百邪走魍魎或生崑崙

或生玄圃其壽不訾食草飲露當其仁也愛及蠢

動不犯虎豹當其威也一聲發吼千人怵息牛馬百物驚斷當其神也立起風雲吐嗽雨露息於天王之林家於太山之廡後御師子其名猛獸元帝使人喚一聲如天之大雷霹靂

漢書曰武帝太始三年郊見上帝西登隴首獲白麟以續宗廟元首元年幸雍祀五時獲白麟之歌終軍對曰野獸并角明同本也殆將有解辮髮削左衽籠冠冕要衣裳而象化者由是改元曰元狩數月越地及匈奴名王來降

平露安傾屈軼安指

白虎通曰平露樹名也

孫氏瑞應圖曰狀如車

蓋生於庭以候四方之正其國正平則正一方不正則不應一方稍傾也其根若絲一名平慮王者慈仁則生 春秋潛潭巴曰君臣和德道度叶中則生於庭 白虎通曰賢不肖位不相踰亦生於庭

田俅子曰黃帝時常有草生於庭階若佞人入朝則草屈而指之名曰屈軼草是以佞人不敢進也
具區文蜃陵屈角鯉

周書王會曰成王時具區獻文蜃吳之震澤也蜃蚌蛤之類今海中小蛤亦有文者雕鏤彪炳異常
所見

山海經曰龍魚陵居狀如鯉一曰鯪魚即有神聖
乘此以行九野 郭璞曰似鯉魚而一角也
朱草復生白象不死

白虎通曰朱草赤草也蓋百草之精 抱朴子曰
其狀如桑莖長三四尺枝葉皆丹莖如珊瑚生名
巖之下剋之汁流如麪 感精符曰王者德洽於
地則朱草廣生 孝經援神契曰王者德至草木
則生 宋均曰食之令人不老 淮南子曰堯德
清平則生舜時又生 孝經援神契曰周公踐祚
理政與天合朱草生 東觀漢紀曰光武中元元
年有赤草生於水涯 魏畧曰文帝欲授禪有朱

草生文昌殿前 宋紀曰文帝元嘉十一年朱草
生益州郫縣

孫氏瑞應圖曰王者政教得於四方則白象至一
本云人君自養有節則負不死藥而來 周書王
會曰成王時南人獻白象 韓子曰黃帝合鬼神
於泰山駕象車 說文曰其狀如皎白六牙道貴
德遠兵故多卷九象牙垂白以和疆 熊氏瑞應
圖曰神靈滋液百珍寶用白象 宋均曰色白如
素也 宋書曰文帝元嘉元年見零陵兆陽也
嘉禾孽莖苾苾宜子

白虎通曰嘉禾太和之爲美瑞一名導 司馬相

如封禪書曰導一莖六種於扈 典畧曰盖五穀
之長稔歲之精也 晉中興書曰或異敏同穎或
孳連數穗或一稔二米以應質文也 孫氏瑞應
圖曰王者德茂嘉禾生一本云世太平則生 又
曰德茂則二苗共秀而生 帝紀曰神農時嘉禾
生 徐整三五歷曰黃帝時嘉禾爲糧 尚書中
侯曰帝堯清平比隆伏羲嘉禾孳連 春秋說題
辭曰嘉禾之孳七莖長五尺至世五穗以成德也
孫氏瑞應圖曰夏時盛德二本而同秀殷湯德
洽則二秀而同本

周書王會曰成王時康民獻芣苢如李實食之宜

子也

赤虎導騶白狼度水

宋紀曰文帝元嘉世五年益州騶虞見二赤虎爲導

又曰王懿與慕容垂戰敗逃叛雨水暴漲津徑斷絕忽有白狼走至懿前仰天而號訖度水懿循狼跡而過 鄭玄注尚書中候曰白狼金精

鳥狀前赤牛生上齒

漢書曰宣帝西河築世宗廟於是有一鳥狀如鶴前赤後青

地鏡曰世主治而益地則牛生上齒

躉芑白苗芝英黃裏

毛詩曰誕生后稷克岐克嶷以就口實誕降嘉種
惟躉惟芑 毛萇曰躉赤苗芑白苗

論衡曰芝英紫色之芝也其栽如豆 宋紀曰順
帝昇明二年臨城縣生紫芝一株蓋黃裏采掇歷
時色不變也

臨江之橘九巖之梓

宋紀曰明帝泰始六年臨江縣橘樹生子蓋江北
生子則為瑞

齊書曰徐伯珎太末人也隱居九巖山門前忽生
梓樹一年便合論者以為隱德之感

宋之黑麋晉之白鹿

宋起居注曰文帝時獲黑麋

晉中興書曰元帝太始四年白鹿二見于南昌蓋
白麋之流也 又曰孝武帝太明元年見會稽諸
暨因獲之以獻

蔓竹常生珊瑚連理

禮稽命徵曰王者禮得其宜則蔓竹爰簫生於廟
禮斗威儀曰人君乘土而王其政太平則蔓竹
常生

宋紀曰孝武帝太明六年鬱林郡獻珊瑚連理也

龜毛何白魚目何比

齊書曰宋昇明三年太祖為齊王白毛龜見東府
城池中

尚書中候曰古之王者將興封禪則東海進比目
魚 孫氏瑞應圖曰王者明德幽遠則比目魚見

熊氏瑞應圖曰王者循訪則比目魚見 鄭康

成郭景純皆云狀如斗脾細鱗紫黑色一眼兩片
相合乃能行今吳中東海之形狀與此說相符合
吳人謂之板魚或呼為魼 爾雅曰魼青比目魚
也出於東海不比不行也

豫章之桐秣陵之李

范甯集為豫章太守表白永循公國相萬至解稱

至縣西北出二里有林林中有梧桐樹下根相去
二丈上枝相去一丈八尺連合成一

齊書曰永明四年秣陵有李樹連理 又曰僧秀

園中四樹共為一株

胡為委威胡為延喜

孫氏瑞應圖曰君臣各有禮節上哀下下奉上則
委威生一本云王者禮至則生又云王者愛人命
則生

孝經援神契曰王者孝德刑于四海德洞淪冥八
方化神並榮延喜也 又曰王者德及山陵則出
孫氏瑞應圖曰王孝道則見也

貝若車渠龜游卷耳

孝經援神契曰王者德至淵泉則江出大貝 尚
書大傳曰貝自江出大若車渠文王拘羑里散宜
生之江淮取大貝如車渠以獻紂免西伯之難
白虎通曰靈龜者神龜也黑神之精五色鮮明知
存亡明吉凶故食氣而神三百歲遊於渠葉之上
三千歲遊於卷耳之上

醴泉地出神鼎味生

孫氏瑞應圖曰王者德及地則醴泉出狀如醴酒
可以養志水之精也

典畧曰神鼎者質文之精知吉凶存亡能輕重行

息 墨子曰神鼎不灼自熟不爨自沸不汲自滿

五味生焉 孫氏瑞應圖曰神鼎金銅之精也

蜚廉應行肉芝辟兵

春秋潛潭巴曰王者清廉則蜚廉之草生 宋均

曰言瑞應之物應行而生

孫氏瑞應圖曰獼猴萬歲頭上有角額有丹書八

字名之曰肉芝躡地則水流佩之則辟兵也

巨海止波渾河載清

熊氏瑞應圖曰周公攝政有迅雷疾風海不揚波

孔叢子曰天將降嘉應河水先清三日清變白白

變黑黑變黃各三日河水清則天下太平

丹甌孰爨玉甕孰盈

孝經援神契曰神靈滋液百珍寶有丹甌見 孫氏瑞應圖曰五穀豐則丹甌出一本云淫巧棄則丹甌出

熊氏瑞應圖曰四夷賓則玉甕入國一本云王者飲食不流離下賤則出也

山車誰造蒿柱誰營

孫氏瑞應圖曰山車自然之車也蓋山藏之精禮斗威儀曰人君乘木而王其政昇平則山車垂勾勾者曲也不揉而自圓曲故曰垂勾 春秋運斗樞曰瑤光得則山出神車 禮記曰聖人用則

必從天不愛其道地不藏其寶山出器車

大戴禮曰周德澤和洽蒿茂大可以為宮室柱故名曰蒿宮也

周匝曷至富貴曷名

孫氏瑞應圖曰周匝神獸也知星宿之變化王者德盛則至

又曰富貴者鳥形獸頭也

鷓雛海上鷺鷥山鳴

三輔決錄注曰鷓雛者鳳之屬南方之禽狀如鳳五色而多黃 莊子曰常登乎南海止乎北海非練實不食非醴泉不飲

山海經曰南隅之山有鳳鳥雛鸞鶩鶩神鳥也 賈

逵云亦鳳之屬 皇甫謐逸士傳曰狀如鳳五色

而多黃 國語曰周之興也鸞鶩鳴於岐山也

殷自銀溢漢見玉英

漢書曰殷金德銀自山溢吳孫皓天冊元年吳都
掘得長一尺廣三寸刻上有年月字號

晉中興書曰玉英神寶也不琢自成光白若月華

禮含文嘉曰君有常則玉石自明 孝經援神

契曰神靈滋液百珍寶用有玉英 宋均曰尊卑

不失其服則玉石有英華色也 史記曰新垣平

說文帝立渭陽五廟欲出周鼎而有玉英見

宗廟福草章和華平

禮斗威儀曰人君乘木而王其政升平則福草生於廟中 宋均曰朱草之別名也 熊氏瑞應圖

曰宗廟肅敬則福草生宗廟中

孫氏瑞應圖曰華平瑞草也其政升平則生王者德強則仰弱則伍 孝經援神契曰王者德至於地則盛 宋均曰華平應政平也 孫氏瑞應圖曰王者政令均則生 東觀漢記曰章和中有華平生也

淮茅三脊草芝散莖

周書王會曰成王時奇幹獻善茅皆鄉善者

國語曰齊桓公封管仲曰昔者封禪鄒上之黍北里之禾以爲盛江淮之間有一茅三脊以爲藉

史記曰漢孝武帝封泰山得江淮一茅三脊爲神藉 宋書曰武帝大明元年三脊茅生西岍江夏王義恭表勸封禪

孫氏瑞應圖曰王者慈仁則芝草生 東觀漢記曰皇帝建和元年芝草生中黃藏府槃襲 神芝贊曰魏明帝青龍元年神芝生於長平之習陽評昌典農中郎蔣元以聞其色丹紫爲質光耀長尺有八寸五分本圍三寸三分上別爲三幹分爲九支散爲三十六莖莖圍一寸九分葉徑三寸七分

枝榦洪纖連屬有似珊瑚乃詔御府藏之宜且画形遂名其圖也

狐何九尾獸何六足

孝經援神契曰神靈滋液百珍寶用狐九尾 山海經曰四足九尾出青丘之國音如嬰兒食不盡 鄔璞曰太平則出噉其肉不逢妖邪或曰豔毒

白虎通曰九妃得子孫繁昌則至於尾者明後當盛也汲冢周書伯杼子徃于東海至于三壽得一狐九尾 田俅子曰殷湯為天子白狐九尾

陳思王表曰植于鄆城北十里道傍草中見異獸如狐而大馬輒驚不行司馬丁升常從孫鵠觀之

見衆狐數千在前後有一大狐長七尺赤紫色見人視之舉頭樹尾尾甚長大然後知其九尾也

孫氏瑞應圖曰先法脩明三才得所見九尾狐至又曰王者謀及衆庶則六足獸至

麟何獲金鳳何集玉

漢書曰武帝太始二年詔曰朕郊見上帝西登隴首獲白麟饋宗廟渥洼水出天馬泰山見黃金更名黃金麟趾馬蹄以協祥也

又曰先帝幸河東之明年鳳皇集殺禰於所集得玉寶起步壽之宮 史記褚先生云得寶璧玉器也

白澤應德烏車効祥

孫氏瑞應圖曰白澤者皇帝時巡狩至于東海白澤見出能言語達知方物之精以戒於民為時除害則賢君明德則至

熊氏瑞應圖曰烏車山之精瑞車也 孫氏瑞應

圖曰王者德澤流洽於四境則烏車出

赤喙騷裊身吉量

漢書音義曰騷裊者馬也赤喙黑耳 孫氏瑞應

圖曰行三萬里各隨其方而至以明君德也

山海經曰吉量馬名也 周書曰一名吉黃之乘

六韜曰一名雞斯之乘 山海經曰一曰文馬縞

身朱鬣目若黃金出太封之國乘之壽三千歲

孫氏瑞應圖曰王者不儲秣馬則白馬朱鬣赤髦
任賢良則見 又曰明者則來 六韜曰文王囚
於羑里散宜生至犬戎得文馬九六獻紂免西伯
之難 周書王會曰成王時犬戎獻文馬名曰吉
黃之乘也

白鳩濟南黃雀日旁

古今注曰周成時白鳩見而天下鳩合者也 漢
書曰平帝時濟南鳩至白子 晉左貴嬪有鳩賦
孫氏瑞應圖曰祭五岳四瀆得其宜則黃雀集黃
帝將起有黃雀赤頭立日旁帝占曰黃者玉精赤

者火精黃雀者賞萌余當王也

河精握武天鹿浮光

孫氏瑞應圖曰河精水神也人頭魚身握武修文
感夏禹而出

又曰天鹿者純靈之獸也五色光耀洞明 漢書

音義曰天鹿者一角長尾其兩角者辟邪無角者
名扶郊一名桃友 孫氏瑞應圖曰王者孝道備
則至也

卹卹封城蛩蛩西方

周書王會曰成王時封人獻卹卹若龜而長喙

孫氏瑞應圖曰王者德及幽隱矜寡得所則蛩蛩鉅

虛至一本云王者安平則至爾雅曰蠨與蛩
鉅虛比為蛩蛩鉅虛嚙甘草即有難蛩蛩鉅虛負
而走出於西方不比不行說苑曰其狀如鼠后
是兔也

小何生大馬何生羊

孫氏瑞應圖曰王者土地開闢則小鳥生大鳥紂
時雀生鷓於城隅史占之以小鳥生大鳥天下必
安紂介雀之瑞而不脩德居年乃作璇宮瓊室野
王按紂時則周興之瑞也戰國策賈誼新書云
宋康王時有雀生鷓鴣小生巨是伯王天下也康
王大喜不修德行遂死魏志曰黃初中有燕生

鷹口爪皆赤 又曰景初元年有燕生鷲於衛國
形若鷹吻似燕高堂隆云此魏室之大興耳防鷹
揚之臣也後晉宣王興都魏晉瑞也

京房易占曰田邑無憂民人安馬則生羊也

瓶甕誰汲浪井誰揚

典畧曰瓶甕瑞器也不汲而自滿 孫氏瑞應圖
曰王者清廉則瓶甕出一曰王者接於下則瓶甕
見

又曰浪井不鑿而自成者清淨則水流有仙人主
之也

白雀二集黃鵠群翔

宋書曰車駕南巡肆水師於中山二白雀集於華
蓋 齊書曰徐伯珍隱於九巖山有白雀一雙栖
其戶牖論者曰以為隱德之感

春秋繁露曰恩及羽蟲則飛鳥大為黃鵠出見如
鳳皇翔也 東觀漢記曰章帝元和二年巡狩至
岱宗燔柴望祀畢有黃鵠從西南來壇上東北過
于宮翱翔而上

梯歸黑虎華林白麀

爾雅曰黑虎者一名騰說文音騰 山海經曰出於幽

都山 晉書曰懷帝永和四年建平梯歸檻得黑
虎狀如小虎而黑毛深者為斑文

晉中興書曰白麋赤鹿也 孫氏瑞應圖曰王者
刑罰得理則至一本云王者德盛則至 宋書少
帝景平元年義興太守王准之獻白麋又明年又
見南郊太守王華獻之太祖以為休祥廿五年華
林園養白麋生二白子淮南瑯琊並獻 漢獻帝
延康元年見 晉武帝 太始中見 宋咸寧九
年又見也

膏露何甘德星何黃

白虎通曰甘露美露也 孫氏瑞應圖曰蓋神露
之精也 晉中興書曰仁瑞之澤其凝如脂其甘
如飴一名膏露一名天酒 禮稽命徵曰稱謚政

名則葦竹栢受甘露 孝經援神契曰王者德至
天則甘露降之 以中和 宋均曰不得中和之氣
則不降

魏志曰漢桓帝時有黃星見楚宋之分遼東殷墟
善天文言五十年有真人起於梁沛之間其鋒不
可當至五十年後而曹破袁紹天下莫敵

越裳黑雉散宜白狼

漢書曰平帝元始元年越裳重譯而至獻黑雉二
以薦宗廟爾後四年金城塞外羗獻魚鹽之地得
西王母石室以爲西海郡

六韜曰文王囚羗里散宜生得白狼獻紂免西伯

之雜

十二層檉五丈高桑

齊書曰武帝永明五年山陰孔廣園檉樹十二層太守隨王子隆以獻植于芳林苑鳳光殿前

蜀志曰先主少時舍東南角籬上有桑生高五丈餘望之重重如小車蓋見者皆恠之非凡或云當出貴也

房戶連瀾肅慎雜常

白虎通曰賓連瀾者樹名也狀連累相承又曰王者繼嗣平則賓連生房戶故生房戶象繼嗣也孫氏瑞應圖曰王者厥機有序男女有別則生房

室一本云生于房室象后妃有節也

山海經曰肅慎有樹名曰柶常光人伐于此取衣
郭璞曰其俗無衣中國有聖帝代立者則此木生
皮可衣也

胡爲福并胡爲威香

孫氏瑞應圖曰福并草也王者有德則生

又曰威香瑞草也王者禮備則生于殿前 又曰

王者愛人則生

白猴來續赤狸兔昌

梁天監起居注曰四年交州刺史阮研表言林邑
王范續之書稱七八年觀望天風云中國有聖王

臣州來朝乞內附并致一巨白猴

帝王世紀曰周文王拘羑里散宜生於西海得赤
狸以獻紂免西伯之難周文王即西伯也名昌

彭城青毛力牧玄距

齊書曰武帝永明五年武騎常侍唐僭上青毛神
龜一頭七年六月彭城郡田中獲青毛龜

中軍訣曰黃帝伐蚩尤未免愆怨乃睡夢王母遣
道人被玄狐之裘以符授之曰太乙在前天乙備
後得兵符信戰即克矣黃帝寐思其符不能悉意
以告風后力牧曰此天應也雖不得其信戰必自
克力牧俱于威水之側立壇祭以太牢有頃玄龜

距鼈銜符從水中出置壇中而去黃帝再拜稽首授符視之乃所夢之符也色青如皮非皮如綈以血為廣三寸五分表一尺黃帝以擒虫尤也

蠶則野繭穀則田櫓

東觀漢記曰光武建武二年野穀自生野蠶自繭披于山阜民收其利其後耘蚕稍廣二物漸息

吳書曰黃龍二年野蠶成繭大如卵齊書曰高帝建元二年郢州監利縣天井湖水色忽澄清山綿百姓採以為績武帝永明三年護軍府門外楮樹一株並有蠶絲綿被莖

東觀漢記曰光武建武二年野穀櫓生五年彌多

章帝章和元年嘉穀孳生 吳志曰大帝黃龍元
年由拳縣稻自生 梁起居注曰大通三年吳興
野穀櫓生布漫山澤百姓獲利

塗山玄豹江陵白鼠

六韜曰文王囚羗里散宜生至宛懷塗山得玄豹獻
紂免西伯之難 周書王會曰成王時屠州獻玄
豹

宋書曰高帝建元二年江陵獲白鼠武帝永明六
年白鼠見芳林 抱朴子曰鼠壽三歲滿百歲則
色白 梁天監起居注曰元年衮州刺史吳平侯
獻白鼠三十一年郢州刺史豫章王孫獻白鼠一

枚

藉藁光晉萍實得渡

晉中興書曰元帝初誕有神光之異所藉之草如
新刈

家語曰楚昭王渡江得一物大如斗貞赤如日直
觸王舟舟人取獻王問群臣莫識使使問孔子孔
子曰此所謂萍實也 王肅曰水草也可割而食
之吉祥也惟伯者爲能獲焉使者反王食之大夫
魯大夫因子游問曰何以知其然孔子曰吾昔之
鄭過乎陳野聞童謠曰楚王渡江得萍實大如斗
赤如日割而食之甜如蜜楚之瑞也

嘉苾曲河連蓮玄圃

東觀漢記曰章帝元和中嘉苾生 又曰安帝
元初三年東平陵有苾異處同蒂相帝建和三年
嘉苾兩體同蒂 梁起居注曰天監五年晉陵太
守孫廉表曲連獲嘉苾三蒂同莖

宋紀曰文帝元嘉七年連蓮生建康湖一莖兩花
十七芙蓉同蒂孝武帝大明五年生樂游苑二房
一蒂太始六年雙蓮一花生宮玄圃池 梁天監
起居注曰三年生華林園園承惠成以聞又生樂
游苑正陽堂前池大府卿王峻以聞

華山駿鹿湘洲鸚鵡

漢書曰成帝元封元年用事于華山至中嶽獲駿鹿周書曰鹿若疾走漢書音義曰楚人謂麋爲鹿

宋記曰文帝元嘉二十一年湘洲獻白鸚鵡詔群臣並爲賦

何龜八眼何鳥沒羽

帝王世紀曰堯時懽懽民貢沒羽鳥也

宋書曰明帝太始元年八眼龜見吳興郡太守褚淵以獻

雁何爲歌鸞何爲舞

漢書曰宣帝立世宗廟告詞孝昭有五色雁集殿

前作獲雁之歌

山海經曰軒轅之國請浚之野鸞為歌 又曰女
林之山有鳥狀鶴名之曰鸞見天下安平 又曰
鸞鳥鳳之佐鳴中五音肅肅雍雍喜則鳴舞人君
行步有容祭祀有禮親踈有序則至
橘實十二柰蒂十五

晉中興書曰咸和六年平西將軍庾亮送嘉橘十
二實一帶亦嘉禾之流

晉起居注曰太始二年嘉柰生一帶十五實
鵲巢共燕曷豆吐

曹植魏德誌曰有白鵲見焉 古今注曰漢成帝

建始四年白鵲與駿鵲共巢長安人家又章帝元和元年見厭次 晉起居注曰二年白鵲見東萊趙贇以獻 宋書曰文帝元嘉廿二年白鵲見新野 又曰孝武帝大明六年汝南獻白鵲 史記曰漢時平陽出白鵲鸞霍先生 褚先生曰黃帝終始傳云漢興百餘年有長出白鵲之鄉村天下之政霍先生喬夔邠并燕吐豆二事 爰蕭集苑其鳥成文

孫氏瑞應圖曰爰蕭鳳之屬西方之禽也 禮斗威儀曰人君乘土而王其政太平則鳳皇爰蕭集於林苑

臨海異物志曰 其鳥五色成文丹喙赤頭頭上
有冠鳴曰天下太平王者有道則見

獸何為言鳥何為耘

孫氏瑞應圖曰跣蹄者后土之獸也自長言語王
者仁孝于萬民則來夏禹治水有功則至

墨子曰禹葬會稽鳥為之耘 帝王世紀曰禹葬
會稽有群鴈見民耘則拔草根發喙除其機故謂
之耘也

象耕舜葬鸞栖儲墳

墨子曰舜葬于蒼梧之野象為之耕

謝承後漢書曰方儲母終負土成墳鸞栖其墓樹

抱日之氣覆鼎之雲

孝經援神契曰黃氣抱日輔臣納忠德至于天日
抱戴也在上曰戴在旁曰抱

漢書汾陰至錦名姓為人祀魏睢廟旁見地如鈎狀

倍視得鼎祀祠迎鼎至甘泉晏温之極有黃雲覆
其鼎上

襄陽蒼鳥秦郡白鵲

孫氏瑞應圖曰人君脩行孝經被于百姓則蒼鳥
至宋書曰孝武帝大明元年有蒼鳥見襄陽王
玄謨以獻

梁天監起居注曰八年秦郡太守元長言郡人神

延祖見白鵲巢鳥群集其側因獲之以獻也
玄龜負書赤魚遊鑊

尚書中候曰堯沉璧於洛玄龜負書而出背甲赤
文成字止於壇

魏文曰文帝欲授禪赤魚遊露鑊 綦母氏注魏
都賦延康元年見

山陽白鳩京師青雀

襄陽耆舊傳曰黃穆爲山陽太守有德白鳩見

宋紀曰孝武帝大明六年青雀集華林園 宋書
曰明帝太始三年青雀見京師城內南徐州刺史
桂陽王林範以獻

赤雌孤下白魚雙躍

尚書中候曰有火自上覆於王屋流爲雌其色赤其聲魄也 馬融曰雌鳶屬也象武王伐紂也

王肅曰雌如字

尚書大傳曰武王渡河中流白魚雙躍入舟武王俯取以祭泣曰鱗介之物兵象也白者殷家之正言殷以兵衆興也

黃金生碑紫玉爲爵

晉紀曰武帝太始二年繁昌縣有魏文帝受禪碑黃金生焉

禮斗威儀曰人君乘金而王其政聲平則紫玉見

於溪山 熊氏瑞應圖曰王者不藏金玉生光於
山 宋書明帝太始二年于赭杼藏南得紫玉圍
三尺長一尺厚七寸太宗以爲二爵獻于文武二
廟

齊之黑獸晉之白貉

齊書宋人秦始末武陵有黑獸見一角羊頭龍翼
馬足父老咸見之莫識

晉起居注曰武帝時獲白貉

牛生厥石狗養斯肫

京房易占曰兵強主武則牛生石

地鏡曰時勢安澍則狗生肫而養

白雉獻聖玄鶴報恩

典畧曰白雉者岱宗之精也出於孟山 抱朴子
曰九真越裳有之 尚書大傳曰周成時越裳氏
來獻白雉曰吾聞國之黃者曰天無烈風淫雨江
海不波溢于茲久矣意中國有聖人盍往朝之故
重三譯而至 東觀漢記曰光武建武二年南越
獻白雉

八公相鶴經曰粹墨如漆也其壽滿三百六十歲
則色純黑也 孝經援神契曰玄鶴爲人所射歸
噲參參養療之後雌雄各啣一明珠來報

陸生蓮花江出大貝

梁大同起居注曰二年廣州陸地生蓮花刺史蕭勵送與草堂寺釋慧約慧約以聞

尚書大傳曰大貝則自江出也大若車渠 春秋運斗樞曰搖光得則吐大貝 孝經援神契曰王者德至泉則江出大貝 六韜曰文王拘於羑里散宜生之江淮得大貝如車渠以獻紂免西伯之難

長山之龜揚海之解

沈約宋書曰明帝泰始六年六眼龜見東陽長山卦爻也齊書曰武帝永明二年四月長山縣王惠獲六眼龜一頭腹下有萬歡二字并有卦兆

鄧璞註 爾雅曰吳郡陽羨縣君山上有水池池有六眼龜

周書王會曰成王時揚州獻大解注曰揚州東海也並出解解即蟹也

羊銜其穀鳥讓其庭

廣州記曰裴淵于廣州廳 事梁上画五羊象又作五穀囊隨羊懸之云昔高固為楚相五羊銜草於其庭於是圖其象 南越志曰任囂尉佗之時有五仙騎五色羊執六穗秬以為瑞因而圖之於府廳交州亦然

古文瓊語曰晉平公時有鳥從西方來白色皆備

有鳥從南方來赤色皆備集于庭前相見相讓叔
向曰吾聞師曠曰西方有鳥白質五色皆備其名
曰雞其來爲告臣之之祥

大蚓虹舒天螻羊形

河圖說命徵曰黃帝土德故先是大蚓之應 呂
氏春秋曰黃帝時天見大蚓如虹應劭曰螻丘蚓
黃帝土德故地有神蚓大五六圍長十丈黃者地
色螻赤令黃故爲瑞也

呂氏春秋曰黃帝土德先天見大螻黃帝曰土氣
騰土氣騰故其色尚黃其事則土也 高誘曰螻
螻蛄也 河圖曰黃帝起有大螻也見六足名曰

散福 野王按爾雅曰躬天螻天螻即螻蛄也以
事而推非其羊者也 搜神記曰廬陵太守龐企
字子及自說其祖非罪繫獄獄牆有螻蛄蟲行左
右因謂之曰爾若神活我因投飯與之食食盡去
去而復來形稍大數日如羊及當行刑螻蛄夜掘
壁成孔乃破獄而出龐氏自此世祠螻蛄焉
鴈何爲赤鳥何爲青

漢書曰武帝太始二年幸東海獲赤鴈作赤鴈之
歌

孫氏瑞應圖曰成王之時治道太平有青鳥見大
如鳩色如翠 琴操曰孔子與子夏等六十四人

講道德有赤氣貫天魯端門有四書遣子夏往視
之果有四書子夏寫之隨書飛爲青鳥還以視孔
子孔子曰赤氣已前 春秋孔演圖曰血飛爲鳥
化帛書爲消書出署曰孔演圖帝叶光紀制子精
也

抱珥之日同色之星

孝經援神契曰日抱珥則人壽

孫氏瑞應圖曰五星同色皆黃也五星同色天下

偃兵百姓安寧歌舞已行

五色之鳥三角之鹿

漢書曰宣帝元康三年詔曰今春五色鳥以萬數

爵餘飛過翔翔而舞欲集不下令三輔春夏無得
以摘巢探卵彈射飛鳥者也

崔豹古今注曰漢明帝永平九年有三角鹿見於
江陵

陽翟兩稻陳留雨穀

古今注曰漢惠帝三年桂陽翟宮俱雨穀米也

漢書曰宣帝元康四年嘉穀降于郡國

王充論衡曰漢光武建武廿一年陳留穀雨旱以

稗

開陽之柱比閭之木

漢官儀曰開陽門始成未有名夜有一柱來止樓

上瑯琊開陽縣上言南門下柱飛去因刻記年月
于其門或曰七寶生于酒泉郡

周書王會曰成王時白州獻比閭比閭葉若羽伐
其木以爲車終日行而莫盈

洛池玉雞太液黃鵠

孫氏瑞應圖曰玉雞瑞器也王者至孝則至一本
云王者道德合神明則出 帝王世紀曰漢昭靈
后含始遊洛池有玉雞含赤珠名曰玉英吞此者
王始吞之生高祖

漢書曰始元元年黃鵠下建章宮太液池中

珠出於海玉生于谷

孝經援神契曰王者德至淵泉則海出明珠宋均
曰夜照暗也

禮稽命徵曰德禮之制則澤谷之中有白石白玉
宋均曰充金体也色白與金同出山也

璽字萬年印文萬福

晉中興書曰元帝建武元年江陵人虞迪墾田得
白玉麒麟紐璽一以獻文曰長壽萬年

齊書曰典河黃慶宅左有園種菜鮮異采拔隨後
更生夜恒有白光似懸道士傅德占使掘之三尺
獲玉印文曰長承萬福

臨院之榴永嘉之竹

晉隆安起居注曰三年武陵臨院縣有安石榴六子同穎內史庾怡以聞 梁起居注曰天監五年衛將軍蔣仲顛表其家有石榴四子同蒂

淮南子曰太清之始世也明照于日月與造化相雌雄天覆以德地載以樂甘露下竹實滿 高誘曰滿成也 王隱晉書曰武帝太始以來永嘉有竹實之瑞 晉紀曰阮藉見孫登于蘇門山有竹實數百斛

枯木誰字冬笋誰哭

齊書曰永明元年秣陵安明寺有枯木伐以爲薪木裏自然有法大德三字

楚國先賢傳曰孟宗母嗜笋冬節將至笋尚未生
母思之宗入林哀哭笋以爲之生

寶珪河上玉英巖間

春秋曰昭公二十四年十月癸丑子朝用成之寶
珪於河禱河求福甲戌津人得諸河上珪自河出
梁天監起居注曰華山陶隱居采芝巖間得玉英
一枚也

府吏得鈎王母獻環

東觀漢記曰桓帝永興二年光祿勳府吏舍壁下
忽有青氣得玉鈎一枚鈎長一寸三分玦周五寸
四分身皆離鏤

孫氏瑞應圖曰黃帝時西王母獻白環 禮三朝
記曰舜時西王母又獻白環

星既連珠日將五色

易神靈圖曰王者德至時五星若連珠

京房易占曰聖王在上則日光明五色備具燭曜
無已 又云大光天下和平上下俱泰

金勝明功根車表德

孫氏瑞應圖曰世無盜賊則金勝出晉紀曰永和
元年陽穀得金勝一枚長五寸狀如纖勝相溫平
蜀四夷賓服

孝經援神契曰王者德至山陵則根車出 宋均

曰山木根車象也應養載萬物

兔何爲白兔何爲赤

典畧曰兔月白之精也 晉中興書曰白兔蓋神

獸也 抱朴子曰兔壽千歲滿五百歲則其色白

也 晉中興書曰王者尊幼耆老則白兔出 東

觀漢紀曰光武建武十三年越裳獻白兔 又曰

魯平爲趙郡六年頻降瑞嘉白兔見城內

孫氏瑞應圖曰赤兔瑞獸王者德盛則出 熊氏

瑞應圖曰說與白澤同盛德博施聖王登祚厥集

白澤亦臻赤兔澤及靈智辨類識故

神雀翔集文狐繁息

東觀漢記曰明帝永平十七年神雀五色翔集京師帝以問瑞邑侯劉復不能對薦賈博物對曰昔武王脩文之業鸞鷟鳴于岐山宣帝威懷戎狄神雀仍集此降之徵也勅蘭臺給筆作頌班固神雀頌曰戴文履武玄黃五色

熊氏瑞應圖曰文狐狐之有文章者不貪則至其九尾者子孫繁

桑樹櫓生柳葉蟲食

後漢書曰陳字文鍾為丞令有政能桑櫓生三萬餘株民已溫飽

漢書曰昭帝時上林樹斲卧一朝起立生枝葉為

蟲食其葉文字曰公孫病已

花雪集衣甘露降盤

宋紀曰花雪降謝莊下殿雪集衣白上以爲瑞公卿並賦花雪詩

孫氏瑞應圖曰王者德及天則甘露降 廣雅曰

澠 澠澠泥露也和氣通津爲露 漢書曰武帝

作銅承露盤仙人掌擎玉杯取雲表露和屑玉服

封中雲起洛上帝觀

漢書曰武帝封泰山禪夜有光晝有白雲起封中帝王世紀曰黃帝五十年七月庚申天下大霧三日三夜霧除帝遊洛水之上大魚負圖而出今河

圖帝觀篇也

俞兒導伯老人主安

管子曰桓公壯伐孤竹未至果耳漢十里授弓將
矢射未敢發見一人長尺而人物備共冠右祛衣
走馬管子曰臣聞登山之神有俞兒伯王之君與
則走馬前導祛衣其前有頃果如其言

孫氏瑞應圖曰老人星見則主安不見則兵起春
分見卯秋分見丁

八文之狐五音之鸞

周書王會曰成王時青丘獻九尾狐 禮斗威儀
曰人君乘火而王政頌平則南海輸八文狐 白

虎通曰狐死首丘不忘本也明安不忘危也必九尾者九德也其子孫繁息也

山海經曰鸞鳥鳳之佐鳴中五音也

孔雀新昌鸚鵡林邑

宋紀曰孝武帝大明五年新昌獻白孔雀

臧榮緒晉書曰安帝義熙十四年林邑獻白鸚鵡
昆吾切泥玉盃明汁

列子曰周繆王時西戎獻昆吾之劍切玉如泥

孔叢子曰秦王得西秦之刀割玉如割木

十洲記曰周繆王時西戎獻玉盃光照室至庭中
明水汁滿盃甘而香美斯之謂露器

白瑄來獻銀瓮不汲

大戴禮曰舜時西王母獻白瑄 說文曰漢章帝

時零陵文吳景于洽道舜祠下得白瑄

孝經援神契宋均注云銀瓮者不汲自滿一名平

瓮 又曰神靈滋液百珍寶用有銀瓮見 孫氏

瑞應圖曰刑法中民不怨則銀瓮見也

文犀駭雞冠雀嚙鱸

抱朴子曰駭雞者犀之神靈也其角有通天文雞

見之驚駭故一名通犀有一白理如縱者是也以

盛米置雞所飲啄米大驚得角一尺作魚啣入水

水開三尺 孫氏瑞應圖曰王者賤難得之物駭

雞犀出 田俅子曰周武王時倉庭國獻文章騶
孝經援神契曰神靈滋液百珍寶用有駭雞犀也
宋均曰其角光雞見駭之今之通天犀也

曰璊瑁魚犀戴通以和章

范曄後漢書曰楊震客於湖有冠雀噉三鱣魚飛
集講堂前都講取魚進曰蛇鱣者卿大夫服之象
也三者法三台也先生有此昇矣年過五十六事
州郡

印字真帝璽文受天

齊書曰高帝建元四年張慶直買瓦作屋又于屋
間見赤光照內外慶直乃告乃休光乃發視獲玉

印一方八寸上有鼻文曰真帝

江表傳曰吳烈帝軍于洛陽南甄官井上足有五
色氣舉軍人恠之莫敢汲令人浚杼得傳國璽文
曰受命於天既壽永昌方圓四寸交五龍上有一
角之缺

十穎如積五穀有年

晉中興書曰或異敏同穎或滋連數穗或一桴二
米以應質文也 晉書曰愍帝建興元年八月嘉
禾生于農襄平一莖七穗二年生于平州三穗同
莖廿三年生于華林蔬圃之庭十穎一莖參差如
積此見任務靈果頌 禮斗威儀曰人君乘土而

王其政升平則嘉禾並生

禮含文嘉曰綏和五年明五禮則五禾應以大豐
禮稽命徵曰天子祭天地六宗得其儀則五穀豐
熟爲之有年 春秋曰魯桓公三年齊侯使其弟
年來聘其年注曰五穀皆熟有年 又曰桓公十
六年大有年 漢書曰宣帝元康四年歲豐
政平黃金弄玩碧石

禮斗威儀曰人君乘金而王其政象平則黃金光
於深山 孫氏瑞應圖曰王者不藏金玉則黃銀
光於山 孝經援神契曰神靈滋液百珍寶用則
碧石見 孫氏瑞應圖曰王者玩弄之物不用則

碧石見于山也

廬江玉鼎錢塘蒼璧

晉陽秋曰成帝咸熙八年穀成縣民留珪見夜夜
門有光取得玉鼎一枚圍四寸廬江太守路承獻
著作郎曹毗上玉鼎頌

齊書曰武帝永明七年吳郡太守江敫於錢塘獲
蒼玉璧以獻之

十六枚磬三萬觔錫

漢書曰成帝時獲得玉磬十六枚議者以爲善祥
劉向因此說上宜興郡雍

梁起居注曰普通四年南兖州刺史豫章王宗表

于上步埽禱白田獲錫三萬斛潤五千斛

胡爲降麩胡爲岐麥

毛詩曰貽我來麩 漢書曰來麩大麥始自天降
以致和平獲天助也

梁起居注曰大同五年隋郡太守馬狗送三岐麥
三穗

胡爲嘉粟胡爲玄稷

梁起居注曰大同五年始平太守崔頌上言嘉粟
一莖十七穗

漢書曰宣帝神雀元年詔曰乃元康四年玄稷降
於郡國玄稷黑黍也

昌蒲之花扶老之藤

梁書曰大帝少時常見菖蒲花光采鮮麗冠絕衆花

汝南先賢傳曰蔡從字君仲至孝所居井枯棹歲久欲碎爲母病於是憂不敢動搖宿昔生扶老藤一莖鳩巢其上

秬稻生疇黑芝出陵

梁大同起居注曰 年神農太守劉士梁言所部高活唐戴二子創稻苗孳茂一子乃有兩頭三穎時得一秬兩米又見二粒同生一帶者

渠搜犬鼠河圖龍馬

周書王會曰成王時渠搜國獻犬鼠犬鼠者露犬也能飛食虎

禮記曰聖人用民必從天不愛其道不藏其寶故河出馬圖注曰龍馬負圖也 尚書帝命驗曰勤世者愛馬受 宋均曰勤世者勤勞應世也馬若堯時得龍馬負圖也 孔安國尚書大傳曰王者有仁德則龍馬見伏羲之世龍馬出河遂則其文以畫八卦謂之河圖也

植桂鳴官節樹起社

春秋潛潭巴曰官桂鳴下吐諸侯號 宋均曰有聲陌曰桂好木植于宮中猶天子封有聲爲諸侯

也今乃鳴是以聲名于下土之祥也

漢書曰邑王門社有枯樹復生枝葉睦孟以爲木
陰類下民象常有廢故之家公孫氏從民間受命
爲天子者後宣帝立帝本名病已故蟲食葉成文
字云公孫病已立也

雀何黃玉黍何鬱金

春秋孔演圖曰孔子論經會黃書有鳥化爲書孔
子奉以言書天赤雀集上化爲黃玉刺曰孔堤化
應法爲赤制亦雀集 宋均曰特授命之制應也
孫氏瑞應圖曰管者釀黑黍爲酒雜芬芸之草和
鬱金之黍故亦曰鬱管所以灌地降神也謂王者

盛德則地出秬可以爲粇

黑鳥叶帝翠羽耀林

尚書中候洛誥曰塲觀于洛降三分之躡退主榮
光不起黃魚雙躍黑鳥以落隨魚亦止黑帝叶光
紀之使也爲黑玉赤勒日立精天乙受神之福命
予伐桀克于湯滅夏而天下服

孝經援神契曰神靈滋液百珍寶用翠羽耀 宋
均曰翠鳥之羽有光耀林 山海經曰孟山有白
翠

何爲雄毛何爲同心

孝經援神契曰神靈滋液百珍寶用有野雄毛

宋均曰猛鳥也敢闚其尾可以爲冠飾服猛也如今侍中着貂虎貢鷩尾是也

孫氏瑞應圖曰王者德及四方遐夷合同心鳥至熊氏瑞應圖曰謂齊心鳥亦是也

噍鈎之狼巢閣之鳳

孫氏瑞應圖曰湯時有神牽白狼口噉金鈎而入殿庭 鄧璞贊曰矯矯白狼應符虎質乃噉靈鈎惟德是出

帝王世紀曰堯時鳳皇止庭巢于阿閣佳樹 又曰黃帝遊滄洛上與大司馬容光等觀鳳皇噉圖置帝前曾戴德頭揭義背負仁翼挾火音中律呂

信足履文尾擊武音中金石

神魚舞河神雀集雍

漢書曰宣帝元康四年濟河天氣清淨神魚舞河
又二年神雀集雍頌曰戴文履武五色玄黃爰降
爰止來集來翔

王濬白蜩韓侯黃熊

宋書曰文帝元嘉廿四年揚州刺史始興王濬獻
白蜩

周書王會曰成王時東胡獻黃熊 韓詩曰宣王
中興韓侯爲伯日蠻退陌獻其黃熊也

六符階平再中鳥嬉

漢書曰六符三台也三階平則陰陽和風雨時黃
帝泰階六符經曰天子上階諸侯公卿大夫中階
庶人下階上星爲男主下星爲女主中星三公諸
侯下元士庶人泰階不平則五神無祀
易經備曰日之再中烏連嬉也人君仁聖則出之
也

三苗貫桑五極如旗

周書曰成王時苗三貫桑苗同爲一穗意者天下
爲一乎越裳果重譯而至

尚書帝命驗曰日月之房惟參烏龜令信子明旗
星出令之明謂有天子之氣旗星有光明之星也

謂五星也以一隅言之本紀曰歲火紀曰熒惑
墨子曰五星光明首艷如旗

奚為紫脫奚為金芝

禮斗威儀曰人君乘土而王其政太平則紫脫為

常生 孫氏瑞應圖曰王者仁義則紫脫見

梁起居注曰九年金芝廿八莖生平水署少府鄉
蕭芬以聞

四角之羊四眼之龜

宋均曰孝武帝大明二年河南王吐谷渾拾演獻
四角羊

宋書曰明帝太始二年四眼龜見會稽太守巴陵

王休若以獻 齊書曰武帝永明八年六月建城
縣田成田中獲四眼龜腹下有萬齊字

黃魚濟壇青龍處洞

尚書中候曰湯觀于洛降三分之璧退立榮光不
起黃魚雙出濬于壇 齊書曰武帝永明五年南
豫州獻金色魚

熊氏瑞應圖曰青龍者少陽之精也天地之符也
孫氏瑞應圖曰青龍乘雲雨而上下處于泉洞之
中

忠孝石印清廉玉甕

博物志曰張顥爲梁相雨後有鳥似山鵲飛翔近

地令摘之墜地爲圓石椎破得金印文曰忠孝侯
孫氏瑞應圖曰玉甕瑞器也不汲自滿王者清廉
則見也

豹犬口鉅犀魚水開

周書王會曰成王時匈奴獻豹犬豹犬鉅口赤身
四足譙秣三日也

枹朴子曰通天犀角一尺刻作魚銜入水水開三
尺也

曷爲琅玕曷爲玫瑰

孝經援神契曰神靈滋液百珍寶用即玫瑰齊
宋均曰玉名齊潔好也

胡爲樟生胡爲梓擢

晉書曰王廙字世將爲鄱陽太守有枯樟更生荀
崧王歆表勸進中宗曰皓獸應瑞而來臻樹久枯
而更生

豫章記曰松陽門內有梓樹大卅五圍舉株盡枯
永嘉中一旦忽更生榮茂大興中皇帝繼大業

庾仲初陽都賦曰廩木蒼于豫章郎璞曰南郊蔽
梓擢秀祖邑

胡爲騶牙胡爲角端

史記曰漢時建章宮後閣重機中有物出焉其狀
如麋問左右莫能知東方朔曰臣知之願賜美酒

梁飯大食臣乃言詔曰可又曰某所有公田魚池蒲葦數頃願陛下以賜臣乃言之詔曰可言之所謂騶牙者也遠方當來歸義故騶牙先見其齒前後若一齊等無牙故謂之騶牙其後一歲匈奴昆邪上將十萬衆來降

孫氏瑞應圖曰角端獸也日行八千里能言語曉四夷之音明君聖主在位明達外方德被幽遠則奉書而至也

赤鳥成巢玄豹釋縛

春秋元命苞曰赤鳥陽之精也 禮記命徵曰得禮之制澤谷之中有赤鳥 孫氏瑞應圖曰王者

不貪天而重民則赤鳥至 宋書曰孝文大明五
年見蜀郡刺史劉思孝以獻 孝子傳曰吳從徙
爲人也至孝母沒負土成墳廬于冢側有赤鳥巢
其門

六韜曰散宜生至苑懷塗山得玄豹以獻紂免西
伯之難 周書王會曰成王時屠州獻玄豹
雉何升鼎燕何背雀

尚書大傳曰武丁祭成湯有雉飛昇而雉問諸祖
己巳曰雉者野鳥也不當升鼎升鼎者欲爲用也
遠方將有來朝者武丁思先王之道辨髮重譯者
六國來

王隱晉書曰元帝時三雀共登雄燕背三入東安府廳占者以爲當三進爵爲天子

日月合璧龍鳥俱見

易坤靈圖曰至德之朝日月連璧朔望窈窕日月如合璧五星如連珠

漢書曰宣帝時東萊立孝文廟有大鳥跡竟路與白龍俱見

鯉鈇之符鮫旗之炫

說苑曰呂望釣于渭渚得鯉魚剖腹得書曰呂望封于齊 列仙傳曰呂尚冀州人也釣于磻溪二
年不獲比問曰可取止也尚曰非尔所及果得大

鯉又得兵鈔于腹中

孝經援神契曰神靈滋液百珍寶用鮫珠旗 宋
均曰鮫魚之珠有光炫可以飾旌旗

虬何以駮鱠何以蜚

師曠紀曰虬龍者龍之無角者也黃帝時有虬龍
白前身有鱗角背有名字出圖史禁或以授黃帝
淮南子曰女媧之世服應龍駮青虬

山海經曰泰器之山觀水出焉是多鱣魚身黑翼
蒼文而白首赤喙常行西河遊於東海以夜飛有
音如鸞雞鸞雞未詳其味酸食之民狂見天下大
穰

翔風發生甘露表微

尸子曰翔風瑞風也一名景風春為蕨生夏為長
羸秋為收成冬為安寧 禮斗威儀曰人君乘木
而王其政訟平則翔風至 孝經援神契曰德至
八方則翔風至卦表嬉應不失八節鍾呂應不失
氣音度舒應不失宮商 爾雅曰四氣和為通正
謂之景風 論衡曰道至天則和風起
徐氏瑞應圖曰王者和氣茂則甘露降于草木一
本云耆老得敬竹栢受尊賢容衆不失細微則竹
葦受 神仙傳曰軒轅之世民飽甘露清液之野
崑山之民甘露自領所欲飲者壽八百歲西北海

外有人長二千里兩脚間相去千里腹圍一千六
百里促日領天酒五石名曰無路人 淮南子曰
太昔清之始世也天覆以德地載以樂甘露下之
石何生谷珠何出地

禮稽命徵曰得禮之制則澤谷之中有白玉白石
宋均曰允金位也色白與金同出于山也

孫氏瑞應圖地珠瑞珠也王者不以貨財爲寶則
地出珠

三角迭來六足委至

孫氏瑞應圖曰王者法度脩明三統得所則三角
獸至 天鏡曰王者承先王法度無所遺失則三

角獸來

孫氏瑞應圖曰王者謀及衆庶則六足獸至

駁馬曷輸白狸曷致

禮斗威儀曰人君乘火而王其政訟平則南海輸

駁馬注曰黃赤馬 天鏡曰王者不傷禽獸則駁

馬見

又曰人主恩被于四遠則白狸見文王時則見遠

人服

表柱鳴枯大木起悴

齊書曰太祖改樹武晉舊堊表柱忽龍鳴響振山

谷

梁大同起居注曰十年上拜陵先時陵上有大樹
一雙幹似青桐葉如丹桂積年凋悴御輦至一旦
鬱然榮茂勝衆木也

大貝之祥一角之瑞

禮斗威儀曰人君乘金而王其政象平則海出大
貝 孫氏瑞應圖曰王者不貪則海出大貝貝自
海出其大盈車也 鄭玄曰古者以貝為貨

又曰王者六合同歸則一角獸至 熊氏瑞應圖
曰天下太平則一角獸至 齊書曰武帝永明十
年鄒陽獲一角獸麟首鹿形龍鸞共色

胡為玄貉胡為青熊

穆天子傳曰天子獵于澡澤于是獲玄貉以祭河宗郭璞注曰以將有事于河竒以獲故用之道也周書王會曰武王之時不屠河獻其青熊也

白虎銜肉黑狐尾蓬

漢書曰宣帝時河東立世宗廟告祠曰白虎銜肉置殿下

孫氏瑞應圖曰王者政治太平則黑狐見周書王會曰成王時黑狐見山海經曰玄狐蓬尾注曰蓬茸也說苑曰蓬狐文豹之皮也

妣氏薏苡成王梧桐

禮含嘉曰夏姓妣氏女棊吞薏苡生禹春秋前

傳曰循己既感流星又吞神珠意茲以生禹

禮斗威儀曰人君乘火而王其政訟中梧桐爲常
生 宋均曰梧桐大家候興則爲之生有禍殃則
不榮華也詩云梧桐不生于巖太平而后生于朝
陽也 孫氏瑞應圖曰王者任用賢良則梧桐生
東廂注曰生于東廂瑞 周書王會曰成王時梧
桐生于朝陽注曰生山東曰陽也

奚爲漿露奚爲循風

晉陽秋曰廢海西公以馬繯絞煞三子三子死之
日南山獻甘露頒賜公卿三子不獲嘗焉先是太
和平中童謠曰青青脚路楊白馬紫游繯汝非皇

太子那得甘露漿

孫氏瑞應圖曰循風者八方之風應時而至立春之日則東方明庶風至春分之日則東南清明風至一名薰風立夏則南方景風至一名巨風夏至則西南方涼風至一名凄風立秋則西方闔闔風至一名颼風秋分則西北方不周風至一名廣風立冬則北方廣漠風至一名寒風冬至則東北方融風至一名颼風

赤羆息佞白狐哀戎

孝經援神契曰赤羆神獸也神靈滋液百珍寶用有赤羆 宋均曰姦究息佞人逐則赤羆出

孫氏瑞應圖曰佞人遠姦宄息則赤羆入其國
典畧曰白狐者神獸岱宗之精也 春秋潛潭巴
曰白狐至則民利不至則下驕恣 宋均曰狐陽
精也白者神也清白則民受利焉不至君無治行
故下驕 孫氏瑞應圖曰王者法平則白狐至一
本云王者明德動準法度則出宣帝時得之狄戎
衰也 東觀漢記曰章帝時白狐見群臣上壽
晉錄曰武帝咸寧二年白狐九尾見汝南也
白鹿千歲飛莧萬里

晉中興書曰白鹿者神獸也若霜雪自有牝牡不
與紫鹿爲群 抱朴子曰鹿其壽千歲滿五百歲

則色白 山海經曰出下申之山 周書王會曰

成王時黑齒貢白鹿 國語曰王伐犬戎得白鹿

辛氏三秦記曰平王時見白鹿因名其原

孫氏瑞應圖曰飛菟者神馬之名日行三萬里夏

禹治水勤勞歷年救民之災天其應德而飛菟來

宋魚入舟秦龍德水

宋書曰明帝泰始二年華林園天淵池白魚雙躍

入御舟 齊書曰昇明三年齊太祖詣官亭湖廟

有白魚雙躍入舟

孫氏瑞應圖曰黑龍北方水之龍也 洛書曰黑

帝起黑龍見 史記曰秦文公獲黑龍自以為德

水

大鳥悲淚三代髦尾

范曄後漢書曰楊震改葬于華陰潼亭先葬十餘日有大鳥高丈餘向震喪前俯仰悲鳴淚下霑地及葬畢飛去時人立石鳥於墓側

典畧曰三王相代之馬皆陰精也在夏則駟馬黑身白髦尾在躬則驟馬白身黑髦尾在周則駢馬赤身黑髦尾也

奇獸禎漢白鹿祉魏

漢書曰宣帝神雀元年九真獻奇獸蘇林曰象也注曰駒形麟色牛角仁而愛人也魏畧曰文帝

欲於受禪群國奏白麋見也

蒼鳥宋祖青狐周文

宋紀曰高祖伐鮮卑圍廣固將拔之夜有大鳥如鵝蒼黑色飛入高祖帳從事胡番進曰蒼者胡色鵝者我也胡未歸我大吉祥也明旦攻拔之

孫氏瑞應圖曰青狐神獸也 六韜曰周文王拘羑里散宜生之宛懷塗山得青狐以獻紂免西伯之難

玉龜孰辨玉羊孰分

孫氏瑞應圖曰師曠時獲玉龜於河水之涯此爲聖國出 晉書曰懷帝元年有玉龜出於霸水

孫氏瑞應圖曰玉羊瑞器也鍾律和調五聲當節則玉羊見又曰晉平公時師曠至玉羊又崔駰有玉羊之銘

玉典孰器玉雞孰群

孫氏瑞應圖曰玉典者瑞器也王者仁慈則玉典見

又曰玉雞瑞器也王者至孝則至一本云王者道德合神明則出

玉璜孰示玉璧孰出

孫氏瑞應圖曰玉璜者瑞器也五帝應循玉璜出鄭玄曰半璧曰璜尚書中候曰呂望釣于渭水

獲玉璜刻曰姬受命呂佐之搔搔理合德于今昌
來提提取撰爾雅令報在齊撰述昌用起發遵題
遵脩題號五百世姜呂霸世遵姬携

晉中興書曰玉璧仁寶也不琢自成光若明月

孫氏瑞應圖曰王者賢良美德則玉璧出魏志

曰遜帝武熙元年鎮西將軍衛瓘上言雍州兵于

成都得玉璧一枚宋書曰孝武帝大明元年江

垂人朱伯得玉璧一枚徑寸五分以獻梁天監

起居注曰元年臨海太守伏曼容于天台山澗水

中得玉璧一枚徑七寸九分光眼潤于巧精奇

熒惑不變太白合表

孝經援神契曰熒惑不變世和從通 宋均曰不變謂見伏應度色從時也

又曰太白合表四夷從 宋均曰合表從中道也
太白進退主候兵今從中道無進退是夷服其兵
鎮星鈞鈴大電斗繞

孝經援神契曰鈞命決曰蒼帝出鎮合鈴允位昌
注曰赤帝緯聚於東井昌元見其軫也黃方矢射
注曰黃帝出柱矢射射沅也

河圖曰大電繞斗北樞星照郊野感符寶生黃帝
正四輔後嗣七九 宋均曰堰土也四輔輔正四
時者也

蒼壁出郢王牟獲師

宋書曰明帝太始五年郢州獲蒼壁廣八寸五分
安西將軍蔡興宗以獻

孫氏瑞應圖曰師曠時獲白牟

應龍黃野大鱸翠瀉

山海經曰應龍龍之有翼者也居南極犂牛之山
蚩尤伐黃帝帝命應龍攻之冀州之野應龍畜水
蚩尤請風伯雨師縱大風雨黃帝乃下天女曰嫫
兩止遂殺蚩尤

河圖曰挺輔佐黃帝五十四年天老曰河出龍圖
洛出龜書紀帝錄州聖人所紀姓號與謀治平然

後鳳皇處之其授帝圖乎黃帝乃時祭七日七夜
黃冠黃冕駕黃乘載之翟翟旗天老五聖皆從以
遊河洛之間至翠瀉之淵大鱸魚泝流而至問天
老曰見天中流者也曰見之願問五經皆見乃辟
左右獨與天老遊之天老跪而授之其包畢見魚
沉帛圖蘭葉朱文以授黃帝黃帝舒視之名曰錄
圖告黃帝後世傳代謹歲勿泄萬夫圖歡以屬軒
轅

青麈表異赤燕應時

宋起居注曰文帝時獲青麈

熊氏瑞應圖曰王者八節有序經緯齊差應時之

性今則赤燕銜書而至又師曠時銜書而來

群翔之鶴一角之龜

梁大同起居注曰十年上拜陵還至查研百僚拜
候有鶴蔽日羅列成行且鳴翼從入宮 漢書曰

武帝後元元年詔曰朕交見上帝游於北邊見群
鶴留止不羅網靡所獲獻于時太平

梁天監起居注曰十一年六月安豐縣獲一角玄
龜也

白鳥曰陽玄貝曰貽

典畧曰白鳥太陽之精也徐整三五曆日序天地
之初有三白鳥主生衆鳥 孫氏瑞應圖曰宗廟

蕭敬則白鳥至 漢書曰章帝元鳳三年冠石之
祥有鳥數千集于旁成帝河平四年白鳥集孝文
廟下黑鳥從明帝太寧元年吳郡獻白鳥 東觀
漢記曰章帝元和二年王阜爲益州牧白鳥見
周書王會曰成王時羗人獻玄貝貽貝也一名貽
郭璞曰黑貝也

何花之勝何璣之鏡

漢書曰皇后入廟朝先王花勝上有白鳳翡翠毛
熊氏瑞應圖曰文璣如蜃有光耀可以如鏡

何台欽圻何虹誕聖

晉陽秋曰張 亡後中台遂圻太元中還復合正

中國謝太傅為相之所致也

詩含神霧曰握登見大虹竟天意感生舜於姚墟
駿馬輸海神馬鳴門

禮斗威儀曰人君乘火而王其政象平則南海輸
駿馬文狐 孫氏瑞應圖曰王者不貪禽獸則南
海之駿馬見 孝經援神契曰王者德至山陵則
澤出神馬 隨巢子曰三苗大亂天命殛之夏后
受之無方之澤出神馬四方歸之 晉書曰魏末
有馬夜過官牧邊鳴衆馬皆應之明日見其跡大
如斗行數里入海

又曰懷帝六年有神馬鳴城南門

瓠子同蒂桂樹有繁

大同起居注曰梁州進瓠子異體同蒂

禮斗威儀曰人君乘金而王其政象平則桂爲之
常生 汝南先賢傳曰應從仲爲東平太守事親
篤孝惠澤洽著忽有桂於庭粲然繁茂百姓瞻仰
歸養者什三四

生魚之鼎斬蛇之劍

王肅表曰文昭之廟魚生于鼎臣聞之易曰中孚
豚魚言信及豚魚又鼎元吉彖曰鼎象聖人以享
上帝

史記曰高祖以亭長爲縣送驪山徒多道亡道豐

西澤正飲被酒夜經澤令一人行前行前報曰前
有大蛇當徑頽還高祖曰壯士行何畏乃拔劍斬
蛇分爲二逕開行數里醉卧後人來至蛇所見一
嫗哭人問曰何哭曰傷吾子故哭人曰嫗子何爲
見殺曰吾子白帝子化爲蛇當道今赤帝子斬之
人以爲嫗不誠欲答之忽不見

人司琅玕龜送洪範

莊子注曰積石千里河海出其下鳳皇居其上天
爲生食其樹名瓊枝高百廿仞大周圍以琅玕爲
寶天生故爲離珠一人三頭遮卧遮起以司琅玕
世紀曰舜即天子位洛出龜六十五字是爲洪範

所謂洛書也 熊氏瑞應圖曰蒼頡與黃帝南巡
狩登南墟之山臨乎玄扈洛汭靈龜負圖丹甲青
文以授之頡因作書

天何有光日何無主

宋書符瑞志曰元嘉十八年七月天有黃光洞照
于地何承天等奏謂之榮光太平之祥也

禮斗威儀曰人君乘土而王其政太平則日五色
無主宋均曰苞五行之色不主于一也 京房易
傳曰聖王在上則日光五色備 又云日者至陽
之象君玄黃照耀則五色無主

露降如雪物化爲土

宋書符瑞志曰文帝元嘉中甘露頻降狀如細雪
庚蘊瑞應圖曰王者德及遠方則物化爲土

王本紀曰蜀王獵于褒谷秦王以金遺蜀王蜀王
報以禮物盡化爲土秦王大怒臣下拜賀曰土地
也秦得蜀矣果平蜀

何雷火雀何日字王

尚書中候曰秦穆公出狩咸陽天震大雷有火下
化爲白雀嚙丹書入公車公俯取書書曰秦伯霸
也

春秋潛潭巴曰君德應陽君臣和得道度則日含
王字曰含王孝也日中有王字者德象日光所照

無不及矣

氣浮于佳月揚于光

後漢書曰蘇伯何遙見春陵城郭璞曰佳氣哉鬱鬱葱葱光武受命之符也

孫氏瑞應圖曰君不假臣下之權則月揚光 又曰王者動不失時則月爲之揚光

厥生慶山厥出流黃

孫氏瑞應圖曰慶山者王德茂盛則生

淮南子曰盛德之君仁恩廣大則流黃出 高誘曰流黃土精也

升山之神酌泉之人

管子曰霸王之主興升山之神見

孫氏瑞應圖曰王者理訟得所則醴泉出於京師
有仙人以酌之

玄丹陵阿赤草水濱

孝經援神契曰王者德至山陵則陵出玄丹 孫
氏瑞應圖曰王者循至仁則山出玄丹 又曰王
者不竭采色則出

東觀漢記曰光武中元元年祀長陵醴泉出京師
又赤草生于水涯

蒙泉出岫大樹生闔

禮斗威儀曰人君乘土而王其政太平則蒙泉出

於山宋均曰小水出于山可以灌溉則土不殖也
京房易傳曰君德強且昌則木生城一夜一圍上
長數丈此謂城強

氣成龍虎露降竹葦

史記曰沛公上氣皆成龍虎五色此天子之氣也
楚漢春秋曰沛公上氣五色衝天似龍似雲此非
人臣之氣者也

晉中興徵祥說曰王者尊賢容衆不失細微則竹
葦受甘露

椒桂合成穀櫟連理

春秋運斗樞曰枳桂合生剛柔陽注曰椒桂陽星

之精所生猶連體而生者椒桂芬芳美物若文王與呂望劉柔合計揚舉王功作祥也

宋書符瑞注曰文帝元嘉中有穀櫟二樹連理

白虎通曰王者德至草木則木連理 孫氏瑞應

圖曰王者德化洽八方合為一家則木連理 又

曰王者不失民心則木連理

何木生屋何木生水

京房易傳曰君有德生聖子則木生君屋上及朝

廷也

地鏡曰國益地理則木生於水 又曰國理君有

喜則樹忽自大也

麟促日度鳳定律紀

春秋命厯序曰六星之世駕飛麟促日月注曰飛麟麟有翼能促日月者循其度

呂氏春秋曰黃帝聽鳳皇之鳴以別十二律紀也奚龍儻河奚龜庭際

禮斗威儀曰人君乘木而王其政升平則交龍洮於河魏文帝雜事曰黃帝錄圖五龍儻河此應聖賢之圖符也

春秋孔演圖曰文命將興龜穴庭際而幽昌肅訖發鳴焦鳴者也瑞應圖曰幽昌狀似鳳皇銳喙小頭大身細足脰翼若卻葉身短戴義翼信膺仁

負禮至則旱之應也 又曰肅訖狀如鳳皇銳喙
流翼負尾身禮戴信嬰仁膺智見則荒歉之應也
又曰發鳴狀似鳳皇鳥喙大羽翼大足脰身短戴
仁嬰義膺信負禮至則兵喪之應也 又曰焦鳴
狀似鳳凰鳩喙專刑身信嬰禮膺仁負智至則水
之應也四鳥狀皆似鳳皇亦非嘉瑞以水旱之感
今載者將辨非鳳皇而已

夫國之興也必見禎祥國之亡也必見妖孽恠之說
子所不語禎祥之事載諸圖牒以彰君德而昭示萬
代者也夫乘天者莫若龍故應龍為祥乘地者莫若
馬故神馬為瑞彰德也若兆聖者莫若麟故麒麟見

翼聖者莫若鳳故鳳皇降其餘草木鳥獸山河玉石
皆臻其瑞故羲農唐堯已上大瑞無歲無之洎于魏
晉梁齊而下中瑞下瑞有時有矣皆見書于史氏而
光瑞應者富矣庶矣魏晉之社實繁其徒其所異者
玄石圖而已今疏于下翼覽者究其本歟

王隱晉書瑞異記曰劉向五行傳云魏年有和當有
開石出於三千餘里繫五馬其文曰大討曹延康黃
初之際張掖柳谷有開石馬始見于建安形成于黃
初文備于太和其石狀象靈龜宅于川西嶷然盤峙
廣一丈六尺長一丈七尺一寸周圍三丈八寸西南
角高四尺西面高七尺西北角皆高四尺東際與地

平蒼質素章鳳皇龜龍煥炳成形文字粲然斯蓋大
晉受於聖德兼諺之應也麟騁翔鳳白鹿仁虎駒駘
欣庭玉匣玦璜與文交焉麒麟屬歲星歲星主仁仁
德宣流故麟騁列于東鳳皇之類屬熒惑熒惑主禮
禮制得故鳳翔于南白虎之類屬太白太白主義八
方向義故白虎見於西宗廟牲牲屬辰星辰星主信
祭祀明信故神牛陳于北政教之類屬鎮星鎮星主
德德道明故龍馬嘶匣陳圖于中央神馬四者象司
馬宣景文武創帝業也蒼白色者西方之色言龍興
尚金白也爾雅曰騁如馬一甫不角者曰麒麟之屬
瑞應之獸也今既騁有麟使仙人乘麟而華華蓋此

則天之使者圖書瑞應以告言當受終也麟之為言
與神為隣提之為言與神為隣仙人者言德合天地
遷于人也鳳者天下太平則見言平蜀美天下一統
白虎白鹿國之色也天下將和為一則一角獸為瑞
珖者決疑言曹氏傳而無疑武帝亦決疑而受故有
二珖也珮者玉象言聖人口一明也珮之制上有白
衡下有雙璜者周文於磻溪而受玉璜明大晉大德
侔周也大金馬之前有白玉匣其蓋開而闔匣上有
王字者此則天授大馬創其西方銜負白玉之匣開
示圖象也昔聖帝授圖並以玉為匣匣南五字上下
三大王者詩云惟此文王寶始翦商文王三分天下

而有其二故三王也大討曹者討曹之違也述大金者金是晉之所尚述謂遵循言大晉追述唐虞故事也金也金但取之者言曹氏運盡大晉受金命而取之又有十金者言金王當十世也六中者潁川府君至武帝凡六世世著功德也又中大金馬者元言武帝于司馬之中功德最大也壽者大吉也又有甲寅述水者公孫淵反在甲寅之前宣帝乃伐之越遼海而往還也斯實晉氏之大瑞矣魏氏春秋漢晉春秋及張掖太守所上圖搜神記及程猗瑞校此圖大同而小異諸圖故不徧書書其篇目而已


稽瑞終

道光時吾邑顧氏昆仲影宋重刊唐白雲子
稽瑞一書以有韻之文屬辭典貴結構精心已
列入玲瓏山館禁刻中洵是嘉惠後學經兵燹
板有損缺數載以來從原書校補依然完美出
以行世惟季頤序跋咸謂自來各家書目此書
均未載入心竊疑之嗣閱崇文總目傳記類曾
列是編夫而後恍然於涉獵之學志有不可少
者爰誌數語於篇末

光緒十年歲在丙達詔灘月在望後知不足齋主
人虞山鮑廷爵封衡甫謹識



積瑞



王雲五主編

叢書集成初編

瑞

稽

中華民國二十五年十二月初版

輯者

劉

廣

發行人

王

雲

五

上海河南路

印刷所

商

務上海河南路

印書館

發行所

商

務上海及各埠

印書館



02